

## **Afɛ mgbi iPol ongwu fan mbi ama onoyɛɛ Emi iKorinti**

<sup>1</sup> Afɛ nɛ kye mbi ani iPol ngwu Imgbasho kwin ela ogbikye iYesu iKrestu mi oweka mgban, bɛyi iTimoti ongwuneyi le kɛ mbi okwakye mgbi emi odzimgbasho mi iKorinti, bɛyi emi osaan mi ɛsɛ Acaya duu gbɛɛ:

<sup>2</sup> Elela bɛyi iyu nkyɛ mbi Otseyi Imgbasho bɛyi Otse iYesu iKrestu na, no dɛɛ yi ema.

### *IPol ta Imgbasho angba*

<sup>3</sup> Ba ni i tɛ Imgbasho Otso Otse mgbi eyi iYesu iKrestu, Otso odi elela bɛyi Imgbasho nli nu omyɛɛ-myɛɛ duu,

<sup>4</sup> ongwu ndi li nu eyi omyɛɛ-myɛɛ mi ali okakewo duu, ikyegbɛɛ ni eyi kpaa nu ama ndɛɛ yi okakewo omyɛɛ-myɛɛ ngwi eyi abueyi gbɛ mbi Imgbasho mani.

<sup>5</sup> Lubana dafi adɛɛ ogyeegye mgbi iKrestu fɛ kaka oshishe mgbi eyi nɛ, li ngha ngwi omyɛɛ-myɛɛ kpaa fɛ yaokɛ mbi eyi mi ikpewo iKrestu aali.

<sup>6</sup> Kini eyi dɛɛ mi okakewo yɔ, li ikye iyu bɛyi owatɔ-watɔ mgbi ema. Ni eyi dɛɛ myɛɛmyɛɛ yɔ, li mi ikye omyɛɛ-myɛɛ mgbi ema nkyɛ mi onyɔtɛ okwuukwu mgbi ema yi itukwu oshiishi mi adɛɛ ngwi eyi gye yi eka ungwonyi nani.

<sup>7</sup> Ma ɛwɛ ogbe byiibyi mgbi eyi ikye ema le kpɔklɔɔ, ikyesinɛ eyi ye gbɛɛ dafi ema gyadɛɛ

ungwonyi yi eyi nɛ, li ngha ngwi ema dika dɛɛ mi omyɛɛ-myɛɛ mgbi eyi kpaa aali.

<sup>8</sup> I mina eyi gbɛɛ ni ema ka dɛɛ ikwukwu mi adɛɛ ngwi eyi gye mi ayɛɛ mgbi Asia na ba emi engwunee yi. Eyɛ kaka iso ngwi ngha eyi mmyɛ, ikyenghanɛ oshishe kpaa tɔ sisi eyi itukwu.

<sup>9</sup> Mi otsitsi yɔ, itukwu mgbi eyi yɛɛ dafi a gbɔ eyi ikwɔ ikwongye mani. Nghaduu ungwɔnɛ kyɔ ikyegbɛɛ ni eyi ka kye abɔ tsigɛɛ ikye eweyi ba, kpaa mbi Imgbasho ongwu nli kyile inggisɛ mi ikwongye nani.

<sup>10</sup> Imgbasho dula eyi tɔ mi itɔ imio ikwongye nani, o dika dula eyi tɔ. Mbon eyi gbɛwɛbyi gbɛɛ o dika kiyayi odula eyi tɔ kpɔɔ,

<sup>11</sup> dafi ema le tobyi eyi mi ibɔ nɛni. Ibyi inggisɛ ka ta Imgbasho angba ikye ema, mi mse ngwi eyi gbɛ mi ibɔ ntonɛ nɛni.

### *IPol kyata oweka mgban*

<sup>12</sup> Onɛnɛ li abɔ otsigɛɛ mgbi eyi aani: ɛwɛ otɛɛtɛ tso obwɛndɛ gbɛɛ eyi bwa eweyi fyii mi ɛɛ, onghaangha duu mi odzɛɛdzɛ mgbi eyi bɛyi ema, mi osaan bɛyi odzɛ mi otsitsi nkyɛ mbi Imgbasho nani. Eyɛ kyungwɔ ntonɛ mi ozoyeye mgbi ɛɛ nɛ ba, kpaa li mi elela odiidi mgbi Imgbasho.

<sup>13</sup> Lubana eyi lɔ ungwɔ oka ngwi ema ka gbɔn gbɛ hona difwin ba luba. Ani gbekabyi gbɛɛ,

<sup>14</sup> dafi ema difwi eyi mi agya oka nɛ, ema kawa difwi saan gbɛɛ ema ka tsaabɔ igɛɛ mbi eyi, dafi eyi kpaa ka tsaabɔ igɛɛ mbi ema mi egbe ngwi Otɛ iYesu ka yidɔ mani.

<sup>15</sup> Ikyegbɛɛ ani dze yi abɔ otsigɛgɛ mi efu nɛ, n tɛwɛ oteyi kɛ mbi ema ikye ni ema tu mgbede akpe efa.

<sup>16</sup> N tɛwɛ onye mbi ema onani ka kɛ iMasidonia di ye mi iMasedonia nye mbi ema, ni ema di wo ani ofɛ lu iJudia.

<sup>17</sup> Onɔ ani tɛwɛ ungwɔnɛ ma, ani byin lɔɔ? Naadi ani dze dafi inggise ama nli gbela odze gbɛɛ, <<ɛɛn hona ei ikye no kpa inggise angbeka maa>>?

<sup>18</sup> Nghaduu, dafi Imgbasho li nyine ba nɛ, ɛsɔ mgbi eyi mbi ema li <<ɛɛn yi ei ba.>>

<sup>19</sup> Lubana ɛsɔ mgbi Ongwɛ Imgbasho, iYesu iKrestu ngwu ani yi iSaila bɛyi iTimoti gbɔ mi idzidze ema nɛ, li odze mgbi <<ɛɛn yi ei ba>> kpaa mbon li <<ɛɛn alonɔ duu.>>

<sup>20</sup> Lubana mmbwo ondu odzɛɛdze ngwi Imgbasho dze duu, li <<ɛɛn>> mbi iKrestu. Nghane eyi li kɔ <<no dze ngha>> mi ikpewon ikye okye okwɔkwɔ nu Imgbasho.

<sup>21</sup> Ikyenghane li Imgbasho nu eyi yi ema kwudze kpɔklɔɔ mbi iKrestu. Li ongwu sadulu eyi,

<sup>22</sup> o kye ambe otso gbɛɛ eyi li mgban dze eyi diye kye onodzi mgban woke itukwu mgbi eyi dafi ambe mani, otso obwendɛ ungwɔ nkyɛ iyayi.

<sup>23</sup> Imgbasho nu ani ofɛ ni ani kɛ iKorinti ba, ikye ni ema to myɛmyɛɛ.

<sup>24</sup> Eyi yama le si ema siisi mi oyeye onuunu mgbi ema ba, kpaa eyi le kyidɔ yi ema ikye atsa mgbi ema, ikyekye li mi oyeye onuunu ngwi ema kwudze kpɔklɔɔ aani.

## 2

<sup>1</sup> Nghanɛ n bwalu mi itukwu mgben gbɛɛ n ka dzagaba oka kɛ mbi ema oka nu ema itukwu owulu-wulu wuba.

<sup>2</sup> Lubana ni ani nu ema itukwu owulu-wulu ma, li ele sisi toma nka nu ani atsa, li ema ama ani nu ema itukwu owulu-wulu nɛ banaa?

<sup>3</sup> Li ikyengha ani lo kɛ mbi ema aali, gbɛɛ nin wa ba yɔ, nin ka sulu itukwu owulu-wulu yi ama nka nu ani ewo shɛta ntona ba mani. N dze yi abɔ otsigɛgɛ ikye ema duu, ikyesinɛ ema duu ka dze mi atsa yi ani.

<sup>4</sup> Lubana ani lo ema afe nɛ mi itukwu owulu-wulu yi itingga mi igɛgɛ yi etse inɛ kpakpa, ikye onu ema itukwu owulu-wulu ba, kpaa ni ema ye dafi okpitukwu mgbi ani ikye ema dze mani.

### *Okye alobube ta inggise mkpa*

<sup>5</sup> Ni inggise ba yi inggise itukwu owulu-wulu yɔ, otsungwɔ yama nu ani itukwu owulu-wulu dafi o nu ema ibyibyi na jo ole gbɔn mwonya wele kye ba.

<sup>6</sup> Ado okwookwo ngwi ibyi kwon na gyɔgyɔ yan.

<sup>7</sup> Nghanɛ i wogyɔ ni a dzanta di gyilan, ikye no ka kyelela lamyɛ ba mani.

<sup>8</sup> Ikyenghanɛ, ani gbabɔ nu ema, gbɛɛ ni ema yile okpitukwu mgbi ema mbon tson.

<sup>9</sup> Itɔdze ngwi ani lo afe nɛ mbi ema ma, li ikye ombadi di ye kini ema ka yagba siikyenu mi alungwɔ duu yɔ.

<sup>10</sup> Ali inggise ngwu ema dzanta yi obube yɔ, Ani kpaa dzanta. Ma ungwɔ ngwi Ani dzanta na, ni ungwɔ di dze ngwi a ka dzanta yɔ, Ani dzanta

yan, ne yeba ni ungwo dze ongwi a ka dzanta yo  
n dzitan mi ikye iKrestu ikye ema,

<sup>11</sup> ikye ni iSatan ka si eyi ikye weese ba mani.  
Lubana oweka mgban da eyi daada ba.

*Ama ogbo Eso mgbi ondu  
odzedze ofufe*

<sup>12</sup> Ono ngwi ani ke iTroa oka gbeeso mgbi  
iKrestu ma, ani difwi gbee Otse ple me ani ofe wa.

<sup>13</sup> Nghaduu itukwu be ani ese mi ele ba, ikyekye  
n yama kwokyi ine yi ongwunen iTaitusu mi imbe  
na ba. Nghane n nya ma gbee se egbe oka, man si  
nye lu iMasidonia.

<sup>14</sup> Nghaduu n ta Imgbasho angba, ongwu nli  
gbe eyi teyi mi onghaangha mgban mbi iKrestu  
nani, o di nu eyi gbofwe ozoyeye mgbi iKrestu mi  
ali imbe duu dafi mmgbe mani.

<sup>15</sup> Lubana mbi Imgbasho eyi li mmgbe mgbi  
iKrestu mi idzidze ama a dulu ma wato beyi ama  
nle dzili mani.

<sup>16</sup> Mbi ama nle dzili yo, eyi nukwo ikwukwo;  
mbi ama a dulu ma wato yo, eyi gbungbe inggise  
oshishe. Ma li eme me okyo ito ido na?

<sup>17</sup> Eyi dze dafi inggise angbeka nli gbodze Img-  
basho ikye otu eni owaawa na ba, nghaduu, mbi  
iKrestu eyi le gbo otsitsi, dafi inggise ama a do ma  
eso kye mbi Imgbasho mani.

### 3

<sup>1</sup> Eyi dile kyile eweshoo? Naadi eyi mina okye  
afe ka tso ema hona gbe afe mbi ema dafi angbeka  
li kyo maa?

<sup>2</sup> Ema abuema gbikye afe mgbi eyi, ngwi a lo wodze itukwu mbi eyi, ngwi ali inggise duu ye di gbɔn.

<sup>3</sup> Ema tso gbɛɛ ema li afe nkyɛ mbi iKrestu, ambɛ idɔ mgbi eyi, a lon mi eniibe ba kpaa a lon mi Onodzi mgbi Imgbasho oshishe, li mi ikwutse opata ba, kpaa li mi itukwu mgbi inggise owamyɛ.

<sup>4</sup> Ito abɔ otsigegɛ nɛ li mgbi eyi mi ikpewo iKrestu mi inai Imgbasho.

<sup>5</sup> Li ikyegbɛɛ eyi mɛ okyungwɔ ntonɛ abueyi ba, kpaa li Imgbasho nu eyi mfye okyidɔ ntonɛni.

<sup>6</sup> O nu eyi mɛ ogbeeso mgbi ondu odzɛɛdze ofufe, yama li mi afe olɔɔɔ ba kpaa li mi Onodzi; lubana afe olɔɔɔ na li ba yi ikwongye, kpaa Onodzi li nu oshishe.

### *Okwɔkwɔ mgbi ondu odzɛɛdze ofufe*

<sup>7</sup> Ola ogbugbe ngwi a lo mi ikwutse na ba yi ikwongye, nghaduu Imgbasho kye nu yi okwɔkwɔ. Ngwi okwɔkwɔ na le sila nɛ kpaa, ola na nu inɛ mgbi iMose kwɔ ni emi Israi yagba kyinebyin ba.

<sup>8</sup> Nghane ka kyɔsinɛse ngwi idɔ mgbi Onodzi ka kwɔ nghaabo na ba?

<sup>9</sup> Kini idɔ nba yi inggise odzili-dzili dze yi okwɔkwɔ mgban ma, idɔ nba yi osaan ka kwɔ sine na nghalo!

<sup>10</sup> Okwɔkwɔ nba onɛne shewo nɛ, nu ungwɔ ogbugbe na dze yi okwɔkwɔ wuba du.

<sup>11</sup> Ni ungwɔ nle sila ogbugbe na dze yi okwɔkwɔ ma, okwɔkwɔ mgbi ungwɔ nli gyegwu na ka she sine ngha!

<sup>12</sup> Nghane, ngwi eyi dze yi ito ɛwe ogbe byiibi nɛ nɛ, eyi dze yi abɔ otsigegɛ.

<sup>13</sup> Eyi yama dze dafi iMose nkye ayangwuto tukwu ine blii ikye ni emi Israi ka di osila-sila mgbi okwɔkwɔ na ba na ba.

<sup>14</sup> Nghaduu along ngwi a gbɔ ola na yɔ, ayangwuto na li tukwu ma itukwu ofwo ola nani nghataa ba ine, lubana li mbi iKrestu ta ngwi a ka yagba kyi kwulu ayangwuto nani.

<sup>15</sup> Nghataa ba ine ni a gbɔ ola mgbi iMose kpaa, ayangwuto ka tukwu ma itukwu ma.

<sup>16</sup> Nghaduu along ngwi inggise kyata luba mbi Imgbasho yɔ, a li kyi kwulun ayangwuto nani.

<sup>17</sup> Ikyenghane Otse li Onodzi, ma ali imbe ngwi Onodzi mgbi Otse dze yɔ, ewo osheta-sheta dze efu.

<sup>18</sup> Ma eyi ama ayangwuto tukwu eyi ine ba ntonɛ, eyi ka dze dafi idzinggi nka kye okwɔkwɔ mgbi Otse tso mani. Ma dafi Onodzi mgbi Otse le kyido mbi eyi nɛ, eyi ka nghao yɛ dafi ongwu mani di nghao kye okwɔkwɔ mgban tso.

## 4

### *Aludu nwodze ishe ibiibe*

<sup>1</sup> Nghane, dafi li ikpewo elela odiidi mgbi Imgbasho ngwi eyi tu ido nɛ nɛ, i ka yile itukwu iyikpa mi ele ba.

<sup>2</sup> Ikyenghane, eyi fwa ofɛ ungwɔ ama odaada beyi ofɛ ayiwi, eyi kpagya inggise wo hona mwonya mi elodzimgbasho ba. Mi ofɛ oka yɔ, eyi kye otsitsi tsoto saan, eyi kye eweyi nu ikye okyɔ oweka mgbi ali inggise duu mi ine Imgbasho.

<sup>3</sup> Ma ni Eso Osuse mgbi eyi gbosa bayɔ, i gbosa ba mbi ama nle dzili mani.

<sup>4</sup> Imgbasho ongwí esé onéne né blu ama onoyéye ba iné ongwí itukwu, ikye nu ma ka yama di osa mgbi Eso Osuse nli okwókwó mgbi iKrestu nli odzèedze mgbi Imgbasho né ba.

<sup>5</sup> Lubana eyi le gbeeso mgbi eweyi ba, kpaa li eso gbée iYesu iKrestu li Otse di gbogbée eyi li engbido mgbi ema mi ikye iYesu.

<sup>6</sup> Ikyesiné ka li Imgbasho ngbée, <<Ni osa tsoto mi iifu ma,>> nu osa mgban tso mi itukwu mgbi eyi ikye onu eyi difwi ozoyeye mgbi okwókwó mgbi Imgbasho mi inai iKrestu aali.

<sup>7</sup> Kpaa eyi dze yi aludu wodze asuusu, otso gbée mfye ama onghaangha duu kye mbi Imgbasho li mbi eyi ba.

<sup>8</sup> A si eyi kpakpa mi ali agya duu, kpaa a yama dziye eyi ba; i kaka eyi ewo, kpaa eyi yama dze ewo atsi ba!

<sup>9</sup> A nu eyi iso kpaa a kye eyi ngwuta ba; a gbo eyi tukwu esé kpaa a dzili eyi ba.

<sup>10</sup> Alonó duu eyi li kye iso ikwongye mgbi iYesu mi ewo mgbi eyi le ga kye, adzi ni oshishe mgbi iYesu na tsoto mi ewo mgbi eyi.

<sup>11</sup> Lubana eyi ama ndze oshishe ntoné a li kye eyi le nu ikwongye alonó duu ikye iYesu, adzi ni oshishe mgban no fwi tó mi ikpewo mgbi eyi nka bwa neni.

<sup>12</sup> Nghané, ikwongye le kyido mbi eyi ama ogbikye iYesu, kpaa oshishe le kyido mbi ema.

<sup>13</sup> Afé lo gbée, <<Ani gbo ikyekye ani noyeye; mi ito oyeye onuunu na, eyi kpaa gbo ikyesiné eyi noyeye,

<sup>14</sup> ikyekye eyi ye gbée ongwu nkyile Otse iYesu mi ikwu na dika wa kyile eyi kpaa mi ikwu yi

iYesu dika kye eyi yi ema tso mi inai Imgbasho.

<sup>15</sup> Ungwɔ ntonɛ duu li mi ikye abɔ oyaaya mgbi ema, ikye ni elela nle to mbi inggise kwubakwuba na no nu angba ota-ta mbwo fe yangwuta ikye okwɔkwɔ mgbi Imgbasho.

<sup>16</sup> Nghanɛ eyi yama gbeka ngwuta ba. Mi inɛ yɔ i dze dafi eyi le nyanya mani, nghaduu mi onodzi yɔ eyi le yɛɛ ofufe alegbe-alegbe ta aali.

<sup>17</sup> Lubana okakewo ama oshilele ntonɛ le mɛ eyi ofɛ okaka okwɔkwɔ igyegwu nkawa nu adze mgbi eyi ogyeegye duu yɛɛ dafi li unka ba mani.

<sup>18</sup> Ikyenghanɛ eyi kye inɛ mgbi eyi byi ungwɔ ama eyi li di inɛ-inɛ ba, kpaa li mi ungwɔ ama eyi li di ma mi inɛ ba mani. Lubana ungwɔ ama eyi li di ma inɛ-inɛ ntonɛ kawa nye, nghaduu ungwɔ ama eyi li di ma ba ntona li gyegwu.

## 5

### *Imbe odzɛɛdze mgbi eyi mi esho*

<sup>1</sup> Lubana eyi ye gbɛɛ kini a kye afu ngwi eyi lato ele mi ɛɛ nɛ kye nghalu kpaa, eyi dze yi uɔɛ ngwi Imgbasho mbe eyi ele, uɔɛ nli gyegwu mi esho, ngwi a mbe mi abɔ mgbi inggise owamye ba mani.

<sup>2</sup> Ikyenghanɛ eyi le sandu, le gbekabyi gbɛɛ a kawa to eyi angwuto yi imbe ongwi eyi kawa dze mi esho,

<sup>3</sup> ikyesinɛ kini a to eyi angwuto yɔ, eyi ka dze ibiba wuba.

<sup>4</sup> Lubana dafi eyi ka lato afu nɛ nɛ, okye le lo eyi, eyi dile sandu, ikyena i mina eyi odze ibiba ba kpaa nu ma to eyi angwuto yi odzɛɛdze ongwi

esho, ikye ni oshishe igyegwu kye ungwɔ ndzɛ mi mmbwɛ yi eyi nɛ mbe.

<sup>5</sup> Nghanɛ li Imgbasho ta eyi mi itɔdzɛ mgban di kye Onodzi mgban nu eyi, otso ambɛ gbɛɛ li ungwɔ nkawa dzɛ.

<sup>6</sup> Ikyenghanɛ eyi dzɛ yi abɔ otsigɛgɛ alonɔ duu di ye gbɛɛ ngwi eyi ka dzɛ ude mi ikpewo nɛ nɛ, eyi dzɛ enggengga yi Otɛ.

<sup>7</sup> Eyi dzɛ oshishe mi oyɛyɛ onuunu, yama li mi odiidi ba.

<sup>8</sup> Ani gbɛɛ, eyi dzɛ yi abɔ otsigɛgɛ di mina odzata ikpewo nɛni di dzɛ ude yi Otɛ.

<sup>9</sup> Nghanɛ ni eyi dzɛ mi ikpewo nɛ hona dzata ikpewo nɛ kpaa, li imina mgbi eyi okyɔ owitukwu mgban.

<sup>10</sup> Lubana ali inggisɛ duu ka ba inai iKrestu, ikye non fwo eyi ikwɔ. O dika nu ali inggisɛ umba ngyɔ yi idɔ ngwi otsungwɔn kyɔ mi onɔ ngwi o ka dzɛ oshishe mani, yeba ni li osuse hona obube kpaa.

### *Idɔ oyile ide gye*

<sup>11</sup> Nghanɛ, eyi ye ungwɔ nli mmwɛ onu Otɛ Imgbasho mani, eyi li biibɛ yi inggisɛ gbɛɛ nu ma difwi. Odzɛɛdzɛ mgbi eyi le gblegedee mi inɛ Imgbasho, n di tsɛwɛ gbɛɛ le gblegede mi itukwu mgbi ema kpaa.

<sup>12</sup> Eyi dile fya otɛ eweyi mi inɛ ema wuba, kpaa le nu ema ofɛ okye abɔ tsa igɛgɛ ikpewo eyi, ikye ni ema nu ama nli tsaabɔ igɛgɛ mi ungwɔ ama a li di mi inɛ ngha ungwɔ nwoto itukwu ma uka.

13 Ni i dze dafi eyi li emi ede yɔ, li ikye mgbi Imgbasho; kpaa ni eyi dze saan yɔ, li mi ikye mgbi ema.

14 Lubana li okpitukwu mgbi iKrestu non dze ngha aali, ikyekye eyi difwi dafi inggise onyi kwulu mi ikye ali inggise tsatsadu mani, ikyenghane inggise duu kwulu.

15 iKrestu kwulu ikye ali inggise duu, ikye ni ama ndze oshishe duu dze oshishe ikye ewoma wuba kpaa no li mi ikye ongwu nkwulu ikye ma, ongwu a di kyilon mi ikwu nani.

16 Ne, wita onene nghataa lu iyayi eyi li nu inggise mmwe mi odzedze mgbi mmbwe yi eyi ba. Dafi eyi teyi nu iKrestu mmwe mi ito ofe ne nye ne kpaa, onene eyi le kyo ngha wuba.

17 Nghane, kini inggise dze mi ifu iKrestu yɔ, otsungwon li atta ofufe; odzedze mgbi otsungwo ogbugbe nye, otsungwon yee inggise ofufe!

18 Ungwontone duu kye mbi Imgbasho, ongwu nyile eyi gyiide yi ewon ikpewo iKrestu di wo eyi ido oyile ide gye nani:

19 lubana Imgbasho kye alobube mgbi inggise wuuta ba, o yile inggise gyiide yi ewon ikpewo iKrestu. O di kye ido ogbeeso yile ide gye wo eyi abo.

20 Ikyenghane eyi li ama ogbikye iKrestu, i dze dafi Imgbasho kye ekye ootoo mgban le nye ikpewo eyi mani. Eyi le tekye nu ema gbikye iKrestu gbee: Yile ewema gyiide yi Imgbasho na.

21 Imgbasho nu ongwu ndze yi alobube ba na yee ife mgbi alobube ikye eyi, adzi ni eyi yee ama osaan mbon mi inai Ongwu.

## 6

<sup>1</sup> Dafi eyi li ama okyido yi Imgbasho nɛ, eyi le tekye nu ema gbɛɛ elela mgbi Imgbasho ngwi ema gbɛ na no ka nyanya ba.

<sup>2</sup> Lubana Afe gbɛɛ, <<Mi onɔ oyabo mgbi ani ma, ani fwo akwo mgbi abu, mi egbe owato-wato ma kpaa ani ya abu abo.>> N nya ema, onene li onɔ oyabo mgbi Imgbasho, onene li egbe owato-wato.

### *IPol kaka adze*

<sup>3</sup> Eyi yama kye ofishi tukwu inggise onyonyi ofɛ ba, ikye nu ma ka di obube mi ido mgbi eyi ba.

<sup>4</sup> Tatase yo ngwi eyi li engbido mgbi Imgbasho nɛ, eyi kye eweyi nu mi ali ofɛ duu: mi itukwu oshiishi kpakpa; mi onɔ okakewo; mi onɔ okenye-kenye yi onɔ iso;

<sup>5</sup> mi onɔ ibe ogboogbo, mi onɔ obawi yi onɔ ablodze; mi onɔ okyido kpɔklɔ, onuna mi otu ba beyi onɔ enbwa;

<sup>6</sup> mi onɔ odze saan, onɔ odifwi-difwi, onɔ okwu onyɔtse di kyumse; mi Onodzi Osaan beyi mi okpitukwu otsitsi;

<sup>7</sup> mi odze ogboogbo otsitsi beyi mi mfye mgbi Imgbasho; yi okyiika mgbi odze saan mi abugye beyi abube;

<sup>8</sup> nye mi okwɔkwɔ beyi okwushanye, ogbodze obube beyi odze osuse; ingblimɔ, nghaduu inggise li gbɛɛ eyi li ama omwonya;

<sup>9</sup> a ye eyi, nghaduu a kye dafi a ye eyi ba mani; a kye eyi gbɛɛ eyi le kwulu, kpaa eyi ka dze oshishe; a sulu eyi ibe, nghaduu a ngwo eyi ba;

<sup>10</sup> a di eyi dafi eyi le kyelela, kpaa eyi dze yi atsa alongwo duu; a di eyi dafi eyi li emi adze, nghaduu eyi le nu inggise kwuba yee emi aludu; a di eyi dafi eyi dze yi nka ba, kpaa eyi sulu alungwo duu.

<sup>11</sup> Eyi gbodze yi ema emi iKorinti yi itukwu asisa, di kwulu itukwu mgbi eyi nu ema.

<sup>12</sup> Eyi yile okpitukwu mgbi eyi da ema daada ba, kpaa ema le kye mgbi ema da eyi.

<sup>13</sup> N le gbodze yi ema dafi n kika gbo yi emi ong-wani mani, inghawane ema kpaa kwulu itukwu mgbi ema nu eyi na.

### *Ka li ungwonyi yi emi ese ba*

<sup>14</sup> Ka li ungwonyi yi emi ese ba. Lubana li alungwo kwokyi osaan yi imbaali? Naadi li alungwo kwokyi osa yi iifu?

<sup>15</sup> Li ali ogbela-gbela dze idzidze iKrestu yi ude angwula? Li alungwo kwokyi inggise oye Imgbasho yi inggise oye Imgbasho ba?

<sup>16</sup> Li alungwo kwokyi ozu mgbi Imgbasho yi angwula? Lubana eyi li ozu mgbi Imgbasho oshishe. Dafi Imgbasho gbo mani gbɛɛ: <<Ani ka dze yi ama di kyikye yi ama, ani dika li Imgbasho mgbi ama, a dika li emidani.

<sup>17</sup> Ikyenghane tase mboma di gbua yi ama na, li ngha ngwi Otse gbo dali. Ka kye abo gbo ungwwo idza ba, ta ani ka gbɛ ema.

<sup>18</sup> N ka li Otsema, ema dika li emi ong-wani engyulo yi engyaa, li ngha ngwi Otse onghaangha gbo aali.>>

## 7

<sup>1</sup> Emi okeyi, ngwi ondu odzɛɛdze ntonɛ dze mbi eyi nɛ, ni eyi dze kyila yi ungwɔ ama nli nu ewo bɛyi onodzi tsiidza mani, ni eyi kye mmwɛ nu Imgbasho ni eyi fya di dze yɛyɛ dafi ongwu mani.

### *IPol tsatsa*

<sup>2</sup> Mɛ ofɛ ikye eyi mi itukwu mgbi ema, eyi yama kyɔ inggise onyonyi obube ba, eyi mbe inggise onyonyi ba, eyi yama kyɔ inggise ogye ba.

<sup>3</sup> N le gbɔdze nɛ ikye ofwa ema ba; dafi ani teyi gbɔ mani gbɛɛ, ema ka dze eyi itukwu alonɔ duu, yeba ni eyi dze oshishe hona kwulu kpaa.

<sup>4</sup> Ani dze yi abɔ otsigɛɛ mbi ema kpakpa; Ani li dze yi ewo okyile esho mbi ema kwuba. Ema kwu ani ɛwɛ wo kpakpa; mi ali okakewo ngwi eyi tulun duu kpaa atsa mgbi ani ka dondu ba.

<sup>5</sup> Onɔ ngwi eyi wa kaka iMasidonia ma, eyi yama tu onɔ otonya ba, okakewo loka wo eyi. Engyikyili nu eyi okakewo mi esɛ, kpaa mi itukwu yɔ, imio gbɛ eyi sɔ.

<sup>6</sup> Nghaduu Imgbasho nli kwu ama ngwu a kye ma wuuta ba ɛwɛ wo na, kwu eyi ɛwɛ wo mi obaaba mgbi iTaitusu,

<sup>7</sup> di li mi obaaba mgban ta ba, nghaduu li mi ɛwɛ ngwi ema kwun wo nani. O nya eyi dafi ema mina odi ani yi elela ngwi ema le kyɔ ikye ani dafi ema di kye ani wuuta mani, ikyenghanɛ atsa mgbi ani she nghaabo ogbugbe.

<sup>8</sup> Yeba ni afɛ mgbi ani nu ema kye abɔ tiko kpaa, N makwɔ gbɛɛ n ki ye ba. Nghaduu N gbɛɛ N ki ye mi ele, ikyesinɛ N di gbɛɛ afɛ mgbi ani ta ema mmya, kpaa li mi ongwonɔ gwee ta,

<sup>9</sup> nghaduu onene Ani dze yi atsa, ikyegbɛɛ di ani nu ema aba ogyeegye ba, kpaa li ikyegbɛɛ elela okyɔɔkyɔ mgbi ema nu ema itukwu okyata-kyata. Lubana elela okyɔɔkyɔ mgbi ema li oweka mgbi Imgbasho ikyenghane eyi dze ema ifwa mi ofe onyonyi ba.

<sup>10</sup> Elela okyɔɔkyɔ nli mgbi Imgbasho li ba yi itukwu okyata-kyata nli kye inggisɛ kaka owato-wato ngwi n ki ye li dze ele ba mani, kpaa elela okyɔɔkyɔ ongwɛ ɛsɛ nɛ li ba yi ikwongye.

<sup>11</sup> Di ungwɔ ngwi elela okyɔɔkyɔ nli mgbi Imgbasho nɛ kyɔ mbi ema neni: ema mina okyi tso mi otsitsi gbɛɛ di ema li emyemye, Ema kyitingga, I kwulu ema ewo, Le dze ema kwɔkwɔ odi gbɛɛ a ki kyɔ otsitsi, Ema tso saan gbɛɛ di ema dze yi emyemye mi ikye odze neni.

<sup>12</sup> Nghane ngwi ani lo kɛ mbi ema nɛ kpaa, yama li mi ikye mgbi ongwu nkyɔ obube na hona ongwu a kyɔn obube na ba, kpaa li ikyegbɛɛ ni ema di abuema dafi ema gbela yi eyi mi inai Imgbasho mani.

<sup>13</sup> Ungwɔntone duu kwu eyi ɛwe wo. Ungwɔ okyi beke yi ɛwe okwu wo ngwi eyi tu nɛ yɔ, i kpa eyi kwuba odi dafi iTaitusu dze yi atsa mani, ikyekye onodzi mgban bese mi okyɔɔkyɔ mgbi ema duu.

<sup>14</sup> Ani kye ema tsaabo igegɛ biyan, ema di nu ani ayiwi ba. Nghaduu dafi odze ngwi eyi nya ema duu li otsitsi ma, li ngha i tso gbɛɛ ayi ngwi eyi kye ema le kwo yi iTaitusu na kpaa li otsitsi aali.

<sup>15</sup> Ngwi o ka wɛ gbɛɛ ema duu sunu, gbɛ ongwu yi imio yi ewo oshiishi nɛ, okpitukwu mgban mi ikye ema nghao sheeshe.

<sup>16</sup> N dze yi atsa N ka dze yi abo otsigegbe mbi ema beɛɛ.

## 8

### *Umba ogha dzii*

<sup>1</sup> Emi ongwunani, i mina eyi gbɛɛ ni ema ye ito mse ngwi Imgbasho kyo yi emi iKrestu mi iMasidonia mani.

<sup>2</sup> Ngwi a nye mi iso kpakpa di dze abubo saan ne kpaa, a shabota dzii.

<sup>3</sup> Lubana ani kyo obwende gbɛɛ a nu dzii dafi a yagba mani, a di nu jo ngha mfye mgbi ama kpaa. A di kyon mi itukwu asisa,

<sup>4</sup> a tekye yi eyi gbɛɛ a ki nu ama ofe ni ama nu emi osaan umba mi ikye ido neni.

<sup>5</sup> A di kyo dafi eyi mina ma ba, kpaa ababo yo a kye ewoma nu mbi Otse di kye ewoma nu mbi eyi yeye dafi Imgbasho mina gbɛɛ nu ma kyo mani.

<sup>6</sup> Nghanɛ eyi tekye nu iTaitusu, ongwu nteyi tso ema ofe mi umba mgbi ema onuunu nani, gbɛɛ no ye ke mbi ema ka ngyelu ido mgbi umba oghaagha mgbi ema nani.

<sup>7</sup> Dafi ema kyo alungwo duu saan mi oyeye onuunu yi elodze ogboogbo yi ozoyeye yi okwunewo saan beyi mi okpitukwu ikye eyi ne, fya ni ema nghao kyo mi elela mgbi ido mgbi umba onuunu neni.

<sup>8</sup> Li ola n le wo ema ba, kpaa i minen ombadi okpitukwu mgbi ema otsitsi nani ikye okye mba yi okwunewo mgbi angbeka.

<sup>9</sup> Lubana ema ye elela mgbi Otse mgbi eyi iYesu iKrestu, dafi nose o dze aludu mani, nghaduu mi

ikye mgbi ema o yɛɛ adzɛ, ikye ni ema yɛɛ emi aludu mi ikpewo adzɛ mgban nani.

<sup>10</sup> Nɛnɛ li ewodzɛ nnghao tishi mi odzɛ nɛ ngwi ani kye le nu ema aani: Onova nnyɛ nɛ ema li emi ababo oghumba ta ba kpaa di dzɛ yi oweka okyɔ nɔgha.

<sup>11</sup> Ikyenghanɛ ngyɛlu idɔ nani, adzi ni oweka ngwi ema dzɛyan mi ikye idɔ nɛ ma, mbwumbwo, kyon mi odzɛɛdzɛ ungwɔ ngwi ema dzɛyan mani.

<sup>12</sup> Lubana ni inggise dzɛ yi oweka onuunu yɔ, umba mgban kpaa a li gban mi odzɛɛdzɛ ungwɔ ngwi o dzɛyan mani, li mi odzɛɛdzɛ ungwɔ ngwi o dzɛyan ba ma ba.

<sup>13</sup> Oweka mgbi eyi li ogbɛɛ ni a sulu angbeka okye ni okye lo angbeka ba, kpaa li ogbɛɛ ni eyi li ungwonyi.

<sup>14</sup> Ongwi ema dzɛyan kwuba onɛnɛ nɛ ka tobyi ma mi imina mgbi ama, ni ama di wa dzɛyan kwuba a dika tobyi ema mi imina mgbi ema. Ta ema ka li ungwonyi,

<sup>15</sup> dafi Afɛ gbɔ mani gbɛɛ: <<Ongwu ngbe ungwɔ ngwikwo kpakpa ma dzɛyan nyɛsɛ ba, ongwu ngbe ngwikwo gwee ma dzɛyan gwegweligwe ba.>>

### *iTaitusu yi emi ibuge mgban*

<sup>16</sup> Ani ta Imgbasho, ngwu nu iTaitusu itukwu osuse ikye ema dafi ani kpaa dzɛyan nɛ angba.

<sup>17</sup> Lubana iTaitusu gbela yi ekyɛ mgbi eyi oto-to ta ba, kpaa o le ba mbi ema yi ɛwɛ ogbe byiibyi kpakpa yi oweka mgban.

<sup>18</sup> Eyi dile dɔ ongwuneyi mi iKrestu ongwu emi iKrestu duu tsan mi idɔ mgban mgbi Eso Osuse ogbɔɔgbɔ na wafɔ biyan.

<sup>19</sup> Ombwo efu yɔ, emi iKrestu duu dulun gbɛɛ no tawo eyi dafi eyi kye umba ngwi a nu mi ikye okye mmwe nu Otse abuan kye ka nu, odi tso oweka mgbi eyi mi abɔ oyaaya.

<sup>20</sup> Eyi mina gbɛɛ ni inggise onyi ka di endɛ mi onikyo umba ngwi ema nu itukwu onyi nɛ ba.

<sup>21</sup> Lubana eyi le nye mi iso okyungwo nli ayin mani, li mi ine mgbi Otse ta ba, mi ine inggise kpaa.

<sup>22</sup> Odi kiyayi mi odze nɛ yɔ, eyi le dɔ ongwuneyi oka ongwu nli tso eyi alono gbɛɛ ongwu dze yi itukwu ofyumfye-fyumfye na wafɔ yi ama, o di mina otobyi ema onene nghaabɔ ogbugbe ikyekye o nu ema oyeye saan.

<sup>23</sup> ITaitusu yɔ, li ibuge mgbi ani, eyi dile kyido mi idzidze ema ungwonyi; nghaduu emi ongwuneyi angbeka ntone yɔ, a li ama emi iKrestu dɔ ma eso, a di li mmwe mbi iKrestu.

<sup>24</sup> Ikyenghane tso inggise ntone ambɛ okpitukwu mgbi ema beyi itɔdze ngwi eyi dze yi abɔ otsigegɛ ikye ema neni, adzi ni emi odzimgbasho di.

## 9

<sup>1</sup> Odze dzɛma ngwi ani ka lo nya ema ikye abɔ oyaaya ngwi ema ya emi osaan nɛ ba.

<sup>2</sup> Lubana ani ye ewo le gba ema gbaagba oyabɔ, ani dile tsaabɔ igegɛ yi emi iMasidonia mi ele, le nya ma gbɛɛ kye onova nnye nɛ jo ema emi

Acaya wewo onuunu; ma okyɔɔkyɔ mgbi ema na nu ama kwuba kyɛɛ itukwu esho.

<sup>3</sup> Nghaduu n le dɔ emi ongwuneyi eta ntonɛ esɔ ikye ni abɔ otsigɛɛ mgbi eyi ikye ema mi odzɛ nɛ no ka yɛɛ atsika ba, nghaduu ni ema ki wewo, dafi ani gbɛɛ ni ema wo mani.

<sup>4</sup> Lubana ni emi iMasidonia wafɔ yi ani wa di gbɛɛ ema wewo bayɔ, odzɛ eyi le gbɔ ikye ema duu li odzɛ ayayi, eyi ka gyayiwɛ mi abɔ otsigɛɛ mgbi eyi ikye ema, kpaa ema ka nghao gyayiwɛ.

<sup>5</sup> I yɛɛ nghanɛ ani di gbɛɛ li kyɛmɛ-kyɛmɛ onu emi ongwuneyi ntonɛ teyi ka kpadi ema di ngyɛlu ewo owoowo ikye umba ngwi ema zondɔ onu dzii nani. Ta umba mgbi ema ka dzɛ le fɛɛfɛ dika tso gbɛɛ ema nu ikyekyɛ i wo ema, a si ema siisi ba.

### *Eto okya dzii*

<sup>6</sup> Wɛ na gbɛɛ: Inggisɛ nkya gwee ka shɛ gwee, inggisɛ nkya dzii dika shɛ dzii.

<sup>7</sup> Ali inggisɛ no nu ungwɔ ngwi o tsewe mi itukwu mgban gbɛɛ ongwu ka nu mani, No ka nu mi ewewa naadi mi osiisi ba, lubana li kpa Imgbasho yi inggisɛ onu umba yi atsa.

<sup>8</sup> Ta Imgbasho ka yagba nu mse mgban dze yi ema dzii, ikye ni ema dze yi alungwɔ duu, alonɔ duu di fwe nu inggisɛ angbeka mani.

<sup>9</sup> Dafi Afɛ lɔ mani gbɛɛ: <<O kye umba mgban fwe nu emi adzɛ dzii; osaan mgban li gyegwu-gyegwu.>>

<sup>10</sup> Ikyenghanɛ, Imgbasho nli kye eto nu inggisɛ ofwe eto beyi ungwogyɛ na dika nu oba mgbi eto

ungwogye mgbi ema mbwo dika nu umba oshe-she mgbi osaan mgbi ema na yee dzii.

<sup>11</sup> A ka nu ema yee aludu mi ali ofe duu ikye ni ema ghumba dzii alono duu, man mi ikpewo eyi umba mgbi ema ogha dzii na ka yee angba ota-ta mbi Imgbasho.

<sup>12</sup> Ido ngwi ema tole kyo ne, le nu oyabo mbi emidi Imgbasho yuoma ba, le tso ofe ota Imgbasho angba mi ofe idzidza-dzidza.

<sup>13</sup> Ikye ido ngwi ema kyo kye ewema tso ne, inggise ka tse Imgbasho ikye obwende mgbi Eso Osuse mgbi iKrestu neni, beyi umba ngwi ema gha ma yi inggise angbeka dzii nani.

<sup>14</sup> Ma mi ibo mgbi ama ikye ema yo, itukwu mgbi ama ka byidze mbi ema, ikye elela okwulewo ngwi Imgbasho kye nu ema nani.

<sup>15</sup> Ne i ta Imgbasho angba mi umba mgban okwulewo ngwi a ka gbɔn gbe ba neni!

## 10

### *IPol natsondu ido mgban*

<sup>1</sup> Ani iPol abuen le tekye nu ema mi itukwu oleewo beyi ewo oyile ese mgbi iKrestu, ngwi ema li di gbɛɛ ani li <<inggise otishaali>> ono ngwi ani dze yi ema, <<kpaa li inggise ofyunfyali>> ono ngwi ani fyata yi ema nani!

<sup>2</sup> N tekye gbɛɛ, ka nu ani wa dze nya-nya yi ema ono ngwi ani wa ye ba ma ba; lubana ani noyeye gbɛɛ n ka koodze yi ama ngbɛɛ eyi li kyungwo mi odzedze mgbi mmbwe yi eyi mani.

<sup>3</sup> Lubana eyi to ese neni, kpaa eyi li gblika dafi ese li gbo na ba.

<sup>4</sup> Okyiika mgbi eyi li mgbi mmbwε yi eyi ba, kpaa li okyiika nfyumfye kye mbi Imgbasho okyi gbobu ali ogalu mgbi engyikyili duu.

<sup>5</sup> Eyi li kyi bulu angwodze yi ali εwε okyɔɔkyɔ ama n yile afɔ twese yi ozoyeye mgbi Imgbasho duu, eyi di li kyi bwalu ali ewodze duu adi ikye nu ma sunu iKrestu.

<sup>6</sup> Ni ema di tso ikye osu-su mgbi ema ngye yɔ, eyi ka wewo okwo ali inggise nfwā okyɔ mi ola duu adɔ.

<sup>7</sup> Ema li di kwletse-kwletse ta. Ni inggise dze yi abɔ otsigεge gbεε ongwu li mgbi iKrestu yɔ, no ye ta gbεε eyi kpaa li mgbi iKrestu yeye dafi ongwu mani.

<sup>8</sup> Ka dze dafi ani le tsaabo igεge nyese mi mfye ngwi Otse kye nu eyi gbεε ni eyi tobyi ema yama li odzili ema ba neni, nghaduu ayiwi kwu ani mi ele ba.

<sup>9</sup> No ka yama dze dafi afε ngwi ani le lɔ nε, li ikye oba yi ema imio ba.

<sup>10</sup> Lubana angbeka li gbεε, <<Afe mgbi iPol li datu di li siisi inggise, kpaa mi ine-ine yɔ o li aple inggise elodze mgbān kpaa menbwa ba.>>

<sup>11</sup> Itɔ inggise ntona nu ma ye gbεε ungwɔ ngwi eyi lɔ ngwi a di mi afε na, li ungwɔ ngwi eyi ka kyɔ onɔ ngwi eyi dze ine-ine mani.

<sup>12</sup> Ni eyi ka kye eweyi dzεkε hona mba yi inggise ama nli tekpo na ba. Dafi a li kye ewoma mba yi eka mani, i tso gbεε a kwiine ba.

<sup>13</sup> Eyi ka tsaabo igεge mi ungwɔ ndze yi itɔdze mbi eyi ba ba. Eyi ka tsaabo igεge mi idɔ ngwi Imgbasho wo eyi gbεε ni eyi kyɔ mata, ema kpaa woto idɔ neni.

<sup>14</sup> Ngwi i yɛe gbɛɛ ema kpaa woto ido nɛ nɛ, eyi le kyile ewo esho nyɛsɛ ba ni eyi ki ba mbi ema bayɔ, lubana eyi gbɛɛsɔ mgbi iKrestu nɛ lu kpini kaka mbi ema kpaa.

<sup>15</sup> Naadi eyi tsaabo igɛgɛ mi ido ngwi inggise angbeka teyi kyɔ ba. Ɛwɛ mgbi eyi ogbe byiibyi li ogbɛɛ, dafi oyɛyɛ onuunu mgbi ema le kɛɛkiyayi nɛ, ido mgbi eyi mi idzidzɛ ema ka tsɛɛ kpakpa,

<sup>16</sup> ikyegbɛɛ ni eyi gbɔ Esɔ Osuse nye-nye ayɛsɛ ngwi ema to nani. Lubana eyi mina otsabo igɛgɛ mi ido ngwi a teyi kyɔ mi ayɛsɛ mgbi inggise oka ba.

<sup>17</sup> AƔɛ gbɔ saan gbɛɛ, <<Inggise nle tsaabo igɛgɛ yɔ, no tsaabo igɛgɛ mbi Otsɛ.>>

<sup>18</sup> Lubana li inggise nle gbɔ osuse mgbi ewon ma ngwi a gbela yan ba, kpaa li inggise ngwu Otsɛ gbela yan mani.

## 11

### *IPol bɛyi ama ogbikye iYesu emi atsika*

<sup>1</sup> I minɛn gbɛɛ ema ki shitukwu yɛn mi ongwɛ ikwangha mgbɛn nɛni; ma ema le kyɔ ngha kpaa wa.

<sup>2</sup> N le kyoofu inggise Imgbasho ikye ema. Ema dzɛ dafi ongwongyaa n ye ongyulɔ waba, ngwu ani zonu gbɛɛ o ka bongyulɔ onyi nli iKrestu abun nani.

<sup>3</sup> Nghaduu imio wen gbɛɛ, dafi ifa nose kpagya Ifa wo mi ɛwɛ nɛ, kaba itukwu mgbi ema kawa lu enggengga mi otsitsi bɛyi osuusunu ngwi ema le sunu iKrestu nɛni.

<sup>4</sup> Lubana ni inggise ba wa gbɔdzɛ iYesu oka idzidza yi iYesu ngwu eyi le gbɔ nɛ, hona ni ema

gbɛ onodzi idzidza yi ongwu ema teyi gbɛ nɛ naadi gbɛ esɔ oka idzidza yi esɔ ngwi ema tsekise fwo nɛ yɔ, ema li gbela yan plɛ.

<sup>5</sup> Nghaduu n tɛwɛ gbɛɛ <<ama ogbikye iYesu ama okpɔngɔ ntona>> a ngha ani ba.

<sup>6</sup> Kanaba ani li inggise ngwu a tso ani odzɛ ogbɔɔgbɔ saan ba, kpaa n dzɛ yi ozoyeye. Eyi nu odzɛ nɛ gbosa lo ema mi ali ofɛ duu.

<sup>7</sup> Nghane li ungwɔ obube gbɛɛ di ani yile ewani esɛ ikye okyile ema esho mi ogbɔ Esɔ Osuse mgbi Imgbasho nya ema ayayii?

<sup>8</sup> Li ungwɔ obube gbɛɛ di ani gbɛ awuya mbi emi iKrestu angbeka ikye otobyi ema ba.

<sup>9</sup> Onɔ ngwi ani dzɛ yi ema di mina ungwɔ ma, n li okye mbi ema ba, lubana ama onoyeye nkyɛ iMasidonia nu ani ungwɔ ngwi ani mina. Ani kye ewani dzɛkɛ mi ali ofɛ duu gbɛɛ nin ka li okye mbi ema ba, n dika kiyayi okyɔ ngha.

<sup>10</sup> Ngwi otsitsi mgbi iKrestu ka dzɛ mbi ani nɛ tayɔ, inggise onyi mi ayɛsɛ mgbi Akaya ka kwɔ ani abɔ otsigɛgɛ mgbi ani nɛ ba.

<sup>11</sup> Ani gbɛ awuya mbi ema ba gbɛɛ di ekyɛ kyo? Ikyegbɛɛ ema kpa ani itukwu ba naadi sinɛ? Imgbasho ye, ema kpa ani itukwu.

<sup>12</sup> Ani dika kiyayi okyungwɔ ngwi ani le kyo nɛni ikye otukwu ofɛ mbi ama nle pita ofɛ onu ma di gbɛɛ ama le kyidɔ ungwonyi yi eyi ntonani.

<sup>13</sup> Lubana itɔ inggise ntona li ama ogbikye iYesu emi atsika, emi idɔ ama okpagya inggise wo, le kye ewoma tso dafi ama ogbikye iKrestu.

<sup>14</sup> Li odzɛ okwulewo ba, lubana Owapɛ olodu abuan le kyo ewɛ kye gbɛɛ ongwu li ongyesɔ mgbi osa.

<sup>15</sup> Li odze okwulewo ba, ni engbido mgbán tole kyo ewe kye dafi engbido mgbi osaan ya, Imgbasho ka kwo ma ado mi ongyeengye dafi okyockyo mgbi ama dze mani.

*IPol tsaabo igegē mi adze  
mgbán ogyeegye*

<sup>16</sup> N di yilen gbo: Ni inggise onyi ka kye ani gbē di ani li ikwangha inggise ba. Kpaa kini ema kye ngha ya, gbē ani dafi ema li gbē ikwangha inggise, gyo nin tsaabo igegē gwee mani.

<sup>17</sup> Abo ngwi ani kye tsigegē nē ani le gbodze dafi Ongyukwo li gbo ma ba, kpaa dafi ikwangha inggise mani.

<sup>18</sup> Ngwi inggise ibyibyi le tsaabo igegē dafi ese le kyo nē, ani kpaa ka tsaabo igegē.

<sup>19</sup> Ngwi ema di gbē ema kwiinē nē, li kpa ema okwakye yi emi ikwangha.

<sup>20</sup> Mi odzimo ya, ema li gbela yi ama nkwu ema ofyē kpaa hona ama okwu ema inē mbe naadi ama ogye ema mmgbē hona kye ewo ma dze gogo naadi ta ema afe mi inē kpaa mani.

<sup>21</sup> I kwu ani ayiwi ogbē eyi kwiinē ba nyese okyo ito ali nani.

Ni a ka tsaabo igegē ya, ani kpaa ka tsaabo igegē, nghaduu li ido mgbi ayayi.

<sup>22</sup> A li emi iHibruu? A li emi Israi? A li emi ongwē Abrahan? Li ngha ani kpaa dze aali.

<sup>23</sup> A li engbido mgbi iKrestuu? (N le gbodze nē dafi ani dze yeye ba mani.) Nghaduu n kyon ido tishi ngha ma. A li kye ani wo obawi alono-alono duu, a nghao gbo ani ibe, n di ikwongye inē akpe ibyibyi.

<sup>24</sup> Emi iJuda gbo ani onitse osudiwyo diwye-gyanε akpe eda.

<sup>25</sup> A gbo ani ibe yi okwuta akpe eta, a tse ani akwutse onɔɔlɔlɔ, iwudza gbobu yen akpe eta mi eni, n la ifu onekyoo egbe onyi yi otu onyi.

<sup>26</sup> N le dzagaba alonɔ duu. N kpatse yi ibli mi ekyoo, n kpatse yi ibli mi abɔ emumyi, n kpatse yi ibli mi abɔ emi εse mgbi ani, n kpatse yi ibli mi abɔ Udzengye; n kpatse yi ibli mi ogalu, n kpatse yi ibli mi agwɔ agwɔ, n kpatse yi ibli mi onekyoo; n di kpatse yi ibli mbi ama okyɔ odzimgbasho εwε.

<sup>27</sup> N kyidɔ di gbili diyε nuna ba; N ye ungwɔ ngwi a kwun di enbwa yi ekweni di gye ungwogye ba onɔ ibyibyi; Ofu yi ani n di dze ibiba kpaa.

<sup>28</sup> Mi ungwɔ ntonε duu kpaa, ani kye itukwu mgbi ani fake mbi emi iKrestu duu alegbe-alegbe.

<sup>29</sup> Onɔ ngwi angbeka dzewatsi ma ewo li kwulu len. Onɔ ngwi a gyila angbeka kaka ungwɔ obube ma, itingga li kyɔ ani.

<sup>30</sup> Ni ani ka tsaabo igεε kyεmε yɔ, n ka tsaabo igεε mi ungwɔ ama nnu ani dzewatsi mani.

<sup>31</sup> Imgbasho Otso Otse iYesu, ongwu ndze mbiso a ka tsan igyegwu na, ye dafi n le mwonya ba mani.

<sup>32</sup> Mi iDamasiko ma, iGɔna nbyidze abɔ Uto Areta nu ma dze ogalu iDamasene wo ikye obwa ani.

<sup>33</sup> Nghaduu a kye ani woke uya nyε ofaawo tɔ mi ikpishi man ani dzidze tɔ mi abɔn.

## 12

*Inε odiidi yi iba mgbi iPol*

<sup>1</sup> N ka kiyayi otsabo igegɛ kyemɛ. Dafi abɔ oyaaya dɛɛ efu ba nɛ kpaa, n ka kiyayi yi inɛ odiidi yi iba ama nkyɛ mbi Otɛ.

<sup>2</sup> Ani ye inggise oka mi ifu iKrestu ngwu a kyon lu ayɛ esho ongwu ta, onova iwyodene waani. Li mi ikpewo hona mi onodzi ho n yama ye ba, Imgbasho ta ye.

<sup>3</sup> Ani di ye gbɛɛ ongyulo nɛ, yeba ni li mi ikpewo hona mi ikpewo ba kpaa ani ye ba, li Imgbasho yuon ye,

<sup>4</sup> a kyon lu adopo. O fwo ungwɔ ama o ka yagba gbɔn gbɛ ba, ungwɔ ama a nu inggise ofɛ gbɛɛ ni a gbɔn ba.

<sup>5</sup> N ka tsaabo igegɛ yi itɔ ongyulo nani, kpaa n ka yama tsaabo igegɛ ikye ewen ba, sede mi ewo odzaatsi mgbi ani ta.

<sup>6</sup> Ni ani kyi kye gbɛɛ n ka tsaabo igegɛ kpaa, n ka yama li ikwangha ba, ikyekye n kale gbɔ otsitsi. Nghaduu n yeyikpa, ikyenghanɛ inggise onyi ka tɛwodzi ani ngha ungwɔ ngwi ani kyo hona gbɔ ba.

<sup>7</sup> Onu ani nya yi ewo okyile esho mi iba ama okwulewo ngwi ani di ntona yo, a kye ato kwo ani mi ikpewo, a dɔ ongyeso mgbi iSatan oka ikye owa nu ani iso.

<sup>8</sup> N tɛkyɛ yi Otɛ akpe eta gbɛɛ no kyi kyelu iso nɛ mbi ani.

<sup>9</sup> Kpaa o nyɛn gbɛɛ, <<Elela mgbi ani le dzii ikye abu, lubana mfye mgbi ani li nghao tsoto mi ewo odzaatsi.>> Ikyenghanɛ, n ka nghao tsaabo igegɛ yi atsa mi onɔ ngwi ani dzewatsi mani, adzi ni mfye mgbi iKrestu no kyido mbi ani.

<sup>10</sup> Nɛ mi ikye iKrestu yo, n dɛ yi atsa mi ewo

odzaatsi yi ito yi onɔ okenyɛ-kenyɛ yi iso beyi onɔ ofyumfye. Lubana onɔ ngwi ani dzewatsi ma, ani li tu mfye.

*Okakewo mgbi iPol ikye emi iKorinti*

<sup>11</sup> N kye ewen yɛɛ ikwangha, nghaduu li ema kwen kaka ele. I wogyɔ ngwi li ema ki kyen tso, lubana ngwi ani li unka ba nɛ kpaa, n li ungwonyi yi <<ama ogbikye iYesu ama okpongɔ>> ntonani.

<sup>12</sup> Ungwɔ ama nli tso ambɛ mgbi inggise ogbikye iYesu yɔ: Li ambɛ yi ungwɔ ama okwulewo ngwi a kyɔ mi idzidzɛ ema yi onyɔtse okwuukwu nani.

<sup>13</sup> Ani kyɔ yi ema timbi ngha emi iKrestu angbeka sinɛ, li ikyegbɛɛ di ani yɛɛ okye mbi ema ba maa? Dzenta yi obube nɛ na!

<sup>14</sup> Onɛnɛ n wewo odzagaba kɛ mbi ema akpe ongwu ta, n ka li okye mbi ema wuba, ikyekye ungwɔ ngwi ani mina yama li ungwɔ ngwi ema sulun na ba, kpaa li ema abuema. Lubana li engbɛ li byi ama omba ma enbwaba, kpaa li ama omba engbɛ li byi engbɛ enbwa aali.

<sup>15</sup> Nghanɛ n ka dze yi atsa kpakpa ombe alungwɔ ngwi ani dzeyan beyi odzɛɛdzɛ mgbi ani duu. Kini ani tso okpitukwu mbi ema kpakpa ma, ema ka tso mbi ani shɛeshɛɛ?

<sup>16</sup> No dze dafi i dze mani, ani teyi li okye mbi ema ba. Nghaduu, inggise angbeka kale tsɛwɛ gbɛɛ, ani le kyɔɔkyɔ ema ɛwɛ!

<sup>17</sup> Ani kyɔ ema ogye ikpewo inggise ama ani dɔ ma ɛsɔ mbi ema ntonɛ onyi yee?

<sup>18</sup> Ani dɔ iTaitusu yi ongwuneyi ɛsɔ mbi ema. iTaitusu kyɔ ema ogye ba, naadi o kyɔ? Okyɔɔkyɔ

mgbi eyi kye otsonodzi onyi di nye ofe onyi daabana?

<sup>19</sup> Kyε gbegbe ma ema li tsεwe gbεε eyi le naana atsondu eweyi inai emaa? Eyi li gbɔdze mi inε Imgbasho dafi emi iKrestu mani; emi okeyi osuse, alungwɔ ngwi eyi kyɔ duu, li ikye oyabɔ mgbi ema.

<sup>20</sup> Lubana ani le mio gbεε onɔ ngwi ani wa ba, n ka di ema dafi ani mina ma ba, ema kpaa dika di ani dafi ema mina gbεε ni ani dze ma ba. Imio wen gbεε, kanaba onɔgbε ogbɔɔgbɔ yi ofu okyeekye yi itingga okyɔɔkyɔ yi ogbua-gbua yi ombe inggise iyi yi idze odzεdzε yi ewo okyile esho beyi oblu-blu ka dze idzidze ema.

<sup>21</sup> Imio wo ani gbεε nin wa ye ba yɔ, Imgbasho mgbi ani ka nin ayiwi inai ema, itingga dika kyɔ ani yi inggise kwuba ama nteyi le kyungwɔ obube kpaa kyatitukwu mi okpekpe yi alobube mgbi ama beyi amah idza ngwi a kye ewoma tswokε ele na wa ba mani.

## 13

### *Ɔwe ɔweƆwe mgbi iPol ongwi olele*

<sup>1</sup> Nεnε li akpe ongwu ta ani ka ba ema esε jo waani. Dafi Afε di gbɔ mani gbεε, <<Ali odze duu ka yεε otsitsi mi obwendε mgbi inggise efa hona eta sini.>>

<sup>2</sup> N tsekise kwo ema adɔ mi onɔ ani dze yi ema akpe ongwu fan mani. N dile yilen gbɔ ngwi ani dzεma ba nε gbεε: Owa ye ba mgbi ani ma, n ka kye ta ama nteyi kyɔ obube naadi angbeka mkpa ba,

<sup>3</sup> ngwi i yɛ gbɛɛ ema le mina ambɛ oye gbɛɛ iKrestu le gbɔdzɛ nye mbi ani nɛni. Ewo dzan atsi okyidɔ yi ema ba, o li tso mfye mgban mi idzidzɛ ema.

<sup>4</sup> Ikye onu ema ye otsitsi yɔ, a gbokwon mi ekwatsi onɔ ngwi ewo dzan atsi mani, nghaduu o dzɛ oshishe mi mfye mgbi Imgbasho. Mi itɔ ofɛ na kpɔɔ, eyi kpaa ewo dzɛ eyi atsi mbon, nghaduu mi mfye mgbi Imgbasho yɔ, eyi ka dzɛ biyan ikye okyɔn idɔ.

<sup>5</sup> Kyidi di fwo ewema ikwɔ ikye odi ni ema dzɛ mi oyɛyɛ onuunu yɔ. Sede ema ka difwi gbɛɛ iYesu iKrestu wodzɛ mbi ema bayɔ, ema gbo imbadi.

<sup>6</sup> N di noyɛyɛ gbɛɛ ema ka difwi dafi eyi gbo imbadi na ba mani.

<sup>7</sup> Ikyenghane eyi le bibɔ mbi Imgbasho gbɛɛ ni ema ka kyɔ nkoka obube wuba. Li ikye onu inggise di gbɛɛ eyi ngha imbadi ba kpaa ni ema kyungwɔ nli ayin yeba ni eyi kyɔ ayin ba kpaa.

<sup>8</sup> Lubana eyi ka kye afɔ twɛsɛ yi otsitsi ba, kpaa li otsitsi ta ngwi eyi ka kyɔ.

<sup>9</sup> Eyi li dzɛ yi atsa onɔ ngwi eyi dzewatsi kpaa ema fyumfye mani; Ibo mgbi eyi li ikyegbɛɛ ni ema nghao kyɔ saan.

<sup>10</sup> Li ikyengha ngwi ani lɔ ungwɔ ntonɛ onɔ ngwi ani dzɛ yi ema ba ma aani, ikyegbɛɛ ni ani wa ba yɔ nin kale kyɔ yi ema nyanya mi idɔ mgbi ani okyɔokyɔ ba mani, mfye ngwi Otɛ kye nu ani li ikye ofyi ema anya, yama li obulu ema ba.

### *Olɛɛ angba mgbi iPol*

<sup>11</sup> Ongyɛngyɛ yɔ, emi ongwunani se egbe oka na. Gbekabyi okyɔ saan na, gadɔ fwo ekye otooto

mgbi ani, dze mi ondonyi di to mi iyu. Ta Imgbasho mgbi okpitukwu yi iyu na ka dze yi ema.

<sup>12</sup> Ta ewema angba ye tsekwulu ewema na.

<sup>13</sup> Emi osaan duu kpaa le ta ema angba.

<sup>14</sup> Ni elela mgbi Otse iYesu iKrestu yi okpitukwu mgbi Imgbasho beyi okwakye mgbi Onodzi Os-  
aan dze yi ema duu. No dze ngha.

## **Etulo NT**

### **Portions of the Holy Bible in the Etulo language of Nigeria**

copyright © 2024 Initiative for the Translation and Development of African Languages

Language: (Etulo)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

---

PDF generated using Haiola and XeLaTeX on 26 Jul 2025 from source files dated 9 Jul 2025

156b6685-3a62-5375-95ed-97245882cc90